

IMMUNIZATION

India ram chu kum 2014 atangin zeng hri awm tawh lohna (polio-free country) rama puan ni tawh mah ni se, thenawm ramahte zeng hri hi hmuh chhuah leh thin a nih avangin zeng hri ven beihpui thlak a ni leh dawn.

Hemi chungchangah hian Zirtawpni khan State Task Force on Immunization (STFI) chu Aizawlah an thukhawm a, kumin October thla atanga zeng hri danna beihpui thlak chungchang an sawiho. Health & Family Welfare department principal director Dr. Lalthlengliani chuan Mizoram pum huap ni lovin ramdangte nena ramri intawm district pali – Lunglei, Siaha, Champhai leh Lawngtlaiah te zenghri ven beihpui 'Pulse-Polio Sub-National Immunization Day (SNID)' hi October ni 14 khian kalpui a ni dawn tih a sawi a. Dr. Lalthlengliani chuan thenawm ramah te zeng hri hi hmuh chhuah leh thin a nih avang leh mipui an intlawhpawh nasat tawh em avangin, India ram chu a him tawh a ngaih rualin a bik takin ramdang nena inhne hnai district a chengte dinhmun hi a la derthawng reng a ni, a ti. National Health Mission (NHM) mission director Dr. Lily Chhakchhuak pawhin thenawm ramte dinhmun enin zeng hri laka invenna beihpui thlak hi a la tul reng a ni a ti a.

WHO leh International Agency dangte tangrualin he hunah hian WHO in Interagency Health Emergency Kit (IEHK) chu Mizoram sorkar hnenah a hlan bawk a. He Kit in a tum ber chu nu-in him taka nau a neih theih na'n te, inzaina hmun tenau thianghlim taka din chawp theih na'n te a ni. He Kit hian hmanrua leh a tihthianghlimnate, vawi khat hmana paih nghal chi bungraw thianghlim te, naute leh puitling bukna te a keng tel a. Damlo enna tlanglawn – thisen san leh hniam, zunthlum leh thlum lo endikna bakah mit leh beng enna hmanrua, naute leh puitling bukna leh naupang chaw khawp kham lo (malnutrition) tehna te a keng tel bawk a ni. Interagency Health Emergency Kit hian bungraw vawi khat hman chi, tih thianghlim leh theih chi leh a tih thianghlimna hmanrua, thuk chenin a chhawm a. A vaiin thil chi hrang 54 a awm a. Mi 20,000 tana thla 6 daih tura ruahman a ni.

State Immunization Officer Dr Zoramruati Ralte chuan Lai autonomous district council hrutute nen an inhmuhkhawm tawh thu te, tun SNID tana India khua leh tui leh raltlan naupang tinzawnte chhinchhiah na tur ruahmanna an siam thar thu te, District bawrhsapte nena thawhho na tur GAD kaltlanga buaipui mek a nih thu te a sawi a. UNICEF Consultant Dr. Rebecca Sharma chuan Lawngtlai bika zero dose naupang leh vaccine la duh lo an zawnchhuah leh an pek tawh zat te a tarlang bawk a ni

Kumin 2025 a ram chhunga zenghri venna beihpui thlak atan hian central sorkar chuan District 4 chhungah naupang piang hlim atanga kum 5 inkar tinzawn tur 52,505 a rawn siam a, heng mite hian kim taka hmaih awm lova zenghri danna an lak theihn atura ruahmanna chi hrang hrang siam a ni.



DIGITAL CONCLAVE

Information & Communication Technology Minister Dr. Vanlalhlana chuan Mizoramah digital movement chuan nasa taka hma a sawn thu leh harsatna hrang hrangte paltlangin tangkai taka mipui rawngbawl hna a thawh mek thu a sawi.

Goa-a tun hnaia Digital Transformation Conclave vawi 18-na a khualzahawm, Dr. Vanlalhlana chuan Digital infrastructure tih changtlun chhoh mek zel a nih thu sawiin, Mizo Fiber Grid Network project, BharatNet Phase-III project hnuaiah internet chak zawk buaipui a nih thu leh 4G Saturation project hmanga 4G tihchak leh 5G service state puma kalpui tura inruahman a nih thute, fibre pawh luh harsatna hmunah satellite kaltlanga internet pek vek tuma tanlak a nih thute, e-Governance state ni tura tanlak a nih thu leh Mizoram Secretariat pumpui e-Office ah siam niin CM leh Cabinet Minister-te tiamin hmangtu 700 an awm mek thute a sawi a. Heng bakah hian e-RAM, Online OPD, Deaths & Births registration, MPSC Online platform, Vantlang Viltu (Citizen's Eye App), Online Bill payment, KAI App, Leak Apps leh Mipui Aw-te tarlangin hman tangkai an nih dante a sawi bawk.

ICT Minister chuan inbiakpawhna tha chhawp chhuah chu hmasawinna tluantling leh huapzo nei tura lungphum pawimawh tak a nih thu sawiin, Mizoram chuan Industry 4.0 hmanrua hmang tura hma a lak thu leh IoT leh GIS Solution a hman thute, digital literacy program ngaihpawimawh niin Microsoft nena tangdunin

thalaite Artificial Intelligence chungchang zirtirna kalpui tum a nih thute, Bhasini hnuaiah Mizo leh tualto tawng dangte digital platform-ah dah chhoh mek zel a nih thute, Mizoram Startup Mission hmanga digital enterpreneur chawilar a nih thute a tarlang a. Mizoram chuan Digital India siam tura hmalakna a thlawp tlat thu leh digital technology lama hmasawn tura theihtawp chhuah a tum thu sawiin, State dang, technology company leh innovator-te thawhpui a inpeih reng thu a sawi a. Kalkhawmte chu huapzo, chak leh hmalam hun atana inpeih reng Digital India leh ram intodelh, mahni kut kea ding thei - Vikshit Bharat @2047 - siam tura theihtawp chhuahpuiah a sawm nghal bawk a ni.



AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Zanin dar 6 leh a chanve ah Chanchinthar puan leh a ni ang.

